

四庫全書

史部

欽定四庫全書

史部

欽定盛京通志卷八十八

六至八

少詹事_臣曹城覆勘

總校官編修_臣朱鈴

欽定四庫全書

欽定盛京通志卷八十六

忠節五

國朝

鑲黃旗漢軍

正黃旗漢軍

正白旗漢軍

正紅旗漢軍

鑲白旗漢軍

鑲紅旗漢軍

正藍旗漢軍

鑲藍旗漢軍

奉天籍屬

欽定四庫全書

欽定盛京通志卷八十六

忠節

五

國朝

鑲黃旗漢軍

高守官奉天人隸鑲黃旗漢軍原係鴨綠江鎮江守
堡官天聰八年鎮江人叛執鎮守遊擊佟養正送
明總兵毛文龍守官與焉遂遇害加贈佐領世職

以其子高題名襲順治七年九年三遇

恩詔累加二等輕車都尉同旗有崔應泰者原籍廣寧初任
佐領崇德七年隨大軍征明錦州圍塔山城督紅
衣礮攻之礮裂轟擊而沒卹贈如例

管一舉奉天人隸鑲黃旗漢軍順治元年隨

世祖入關授山西德勝路叅將五年大同總兵姜瓖叛脅
從不屈遇害其妻及長子致忠子婦孫女等十三
口皆就戮幼子承業年未週乳母王氏撫抱以行

逃免八年巡撫祝世昌上其事贈副將

張必科隸鑲黃旗漢軍世居蓋平順治四年知直隸慶雲縣下車兩閱月宿弊盡革民荷更生時定鼎之初土賊告警每遇寇至即鳴鼓聚衆率步騎親逐之會上元夜賊聚飲郊外必科謀得其地率丁壯捕之縛三渠斬以徇其黨悉衆圍城必科善射殺賊無算守三晝夜賊黨內應者啓門納賊賊大至必科巷戰殺數人忽弦斷手傷擲弓於地曰

命矣當尋一死所也挺戈下城賊環圍之亦不敢逼至一書齋舉火自焚蒞任六十五日耳事聞

賜祭葬贈山東按察使僉事慶雲士民崇祀名宦祠子一

魁以難廕知河間府廉得當日獻城賊詳請達於朝置重典一魁仕至河東鹽運使子綏遠別見本志

人物傳

范承謨瀋陽人隸鑲黃旗漢軍文程子也康熙七年巡撫浙江有惠政十一年擢福建總督十三年

逆藩耿精忠反巡撫劉秉政為賊腹心欲脅承謨
不屈遂囚之罵不絕口卒為所害

詔贈兵部尚書加太子少保諡忠貞

聖祖念承謨忠節

親灑宸翰書碑勒石又以

御書墨本鈐用

御璽賜其家閩人又為建祠于道山之麓雍正七年入祀

昭忠祠承謨忠孝性生友于敦篤居官剛正廉明

寬厚愛人體卹民隱博學強記善屬詩文被幽時
有蒙谷自序百苦吟武夷歌畫壁吟人多傳之

高天爵鐵嶺人隸鑲白旗漢軍以子其位任大學
士改隸鑲黃旗天爵慷慨重大義好讀書善騎射
能挽強弓順治初任知縣以洪承疇薦知湖南長
沙府尋除江西建昌府康熙十三年耿精忠反天
爵以建不守則南昌必危出募丁壯固繕城垣躬
擐甲冑與賊戰于東門萬年橋被執不屈死

詔贈太僕寺卿諡忠烈入祀九忠祠雍正四年

特加贈禮部尚書

正黃旗漢軍

金玉和奉天人隸正黃旗漢軍自幼從征諸路有
功得授世職累加至二等副將天聰五年擢禮部
承政緣事革職六年復任叅領隨

太宗閱兵北演武場賚鞍馬七年陞任副都統奉

命往諭孔有德耿仲明等崇德六年大軍圍錦州玉和同

副都統和濟格理敗敵步兵時明經畧洪承疇所
部兵遁入三臺玉和隨衆攻克殲之復攻克松山
南山臺松山敵兵乘夜來犯以砲擊却之多斬馘
復攻塔山破其城叙功授佐領世職七年攻中後
所前屯衛破之加世職三等叅領順治元年署懷
慶總兵流賊圍濟源玉和往援歿於陣

詔卹贈世職二等副都統其孫世礪康熙十八年征海賊
劉國軒中矢貫胸歿贈雲騎尉

尚安福奉天人隸正黃旗漢軍崇德三年隨貝勒
杜度征明山東攻鄒縣以雲梯登城歿于陣贈佐
領世職

郭名望奉天人隸正黃旗漢軍崇德八年從征明
中後所克其城順治元年從豫親王多鐸南征破
揚州六月隨貝勒博洛征浙江克嘉興及崑山常
熟江陰三縣以功授加一雲騎尉世職進攻金華
同叅領朱名登攻克之七年九年三遇

恩詔加至三等輕車都尉尋以從征山西攻保德州中鎗
歿加贈二等輕車都尉世職子汝龍于順治十六
年從征福建至羅源擊賊歿于陣加贈世職一等
輕車都尉

祖應元奉天人隸正黃旗漢軍初任佐領崇德八
年隨鄭親王濟爾哈朗征明攻中後所克之進取
前屯衛復以砲克其甕城論功授佐領順治元年
五月隨葉臣等平定山西克太原十一月隨豫親

王多鐸平定河南進攻揚州中礮歿于陣贈佐領
世職

李向舜鐵嶺人隸正黃旗漢軍父獻歲崇德時屢
立戰功授世職二等叅領向舜亦授叅領順治元
年從征江南攻揚州中礮歿其幼弟向日官遊擊
康熙十四年從征湖廣省城被圍竭力捍守城陷
罵賊不屈死

特賜祭葬銀贈叅將

王自明隸正黃旗漢軍世居奉天初任佐領順治三年隨征陝西遇流賊孫守法率本旗騎兵擊敗其衆又賊帥賀珍擁衆列陣於山自明隨定西大將軍和洛會擊敗之五年山西逆鎮姜瓖叛隨巽親王滿達海攻汾州中礮歿於陣贈騎都尉

張鴻猷隸正黃旗漢軍世居奉天初任守備隨豫親王多鐸南征平定河南江南攻揚州嘉興二府及江陰縣武岡寨四城俱克之順治五年逆鎮姜

瓌叛于山西隨巽親王滿達海討之攻渾源州克其城進取左衛中鎗歿于陣贈騎都尉

徐淳隸正黃旗漢軍世居遼東由貢生累陞山西岢嵐道順治五年逆鎮姜瓖叛淳捐軀殉節康熙元年

特贈光祿寺少卿又同旗有成大業世居遼東累任江西湖東道順治五年逆鎮金聲桓叛約大業共謀不從被執罵賊不絕聲遂被害八年贈如例

李向禹鐵嶺人向舜弟也順治五年任陵川令姜
瓌之亂禹妻王氏謂禹曰君職守土宜竭力報國
勿以家為念禹出禦賊王氏與二女先自縊城破
禹被執誘之降且怵以兵不屈死之其長兄向堯
時任助馬路叅將合門七十餘人俱盡節

詔贈向禹光祿寺少卿向堯都督僉事祀本縣忠義祠

劉應舉奉天人隸正黃旗漢軍初任佐領隨大軍征
明攻右衛朔州克其城順治六年隨征逆鎮姜瓌

攻汾州北關廟中礮歿于陣贈騎都尉加一雲騎尉

朱國治撫順人隸正黃旗漢軍崇德時即入旗籍
順治四年知固安令報最由州牧司道厯任巡撫
康熙十二年逆藩吳三桂反被執使降國治罵賊
不屈遂遇害二十年

特恩加贈戶部右侍郎祭葬如典禮雍正七年奉

旨入祀昭忠祀

正白旗漢軍

董廷元隸正白旗漢軍天命六年

太祖始定瀋陽愛其勇力授寬甸備禦天聰五年從征大
凌河六年從征察哈爾七年從征旅順口江華島
並在行間有功崇德元年從征高麗次年攻皮島
所乘船被敵礮擊破廷元同家口俱歿於江

太宗憐其効力有年

特賜祭銀六百兩弟廷儒任大同守備善騎射有謀畧總

兵姜瓖謀逆誘廷儒至署微露其意曰公若助我則大事可成共享富貴廷儒怒罵並拔所佩刀起賊衆羣持之遂被擒廷儒罵不絕聲賊剖心支解之併其子開國及眷口俱被害

特贈昭武將軍

賜祭葬又廷儒弟廷伯崇德五年從征明圍錦州同叅領孫有光擊明松山杏山兵皆敗之七年圍錦州擊明呂翁山嘴兵敗之松山敵兵乘夜來犯擊却其

衆進攻塔山杏山敘功列一等陞授佐領八年從攻前
屯衛中後所並克之順治元年授加一雲騎尉二
年

恩詔加佐領世職是年從豫親王多鐸南征平定河南五
月克揚州六月擊平湖嘉善敵兵敗之又敗嘉興
敵兵克其城至錢塘江有敵兵夜犯我營廷伯隨
都統吳守進擊敗之六年從鄭親王濟爾哈朗征
湖廣同副都統金維城領兵至馬河陣亡贈騎都

尉加贈一雲騎尉七年九年兩遇

恩詔加至二等輕車都尉世職罔替廷元兄弟三人並以

死事著人稱為一門忠烈云

滕應元奉天人隸正白旗漢軍官佐領天聰四年
大軍伐明取永平復攻灤州應元轉戰而前陷陣
歿

詔加優卹予騎都尉世職

黃廷栢隸正白旗漢軍世居奉天授靈璧令涖任

五月以才能調大興順治三年擢知山西汾州府
五年大同總兵姜瓖叛明年四月偽副將姜建勲
擁賊萬騎猝圍汾州攻陷城東門廷栢率壯士與
賊鏖戰自晝至夜力屈被執罵不絕口遂遇害委
屍於路子莫中年十三守父屍號泣汾人感其德
具棺斂之既而莫中亦被賊執碎其首幸不死九
月汾州事平喪還

世祖特遣官諭祭追贈太僕寺卿康熙五十七年

聖祖特命立祠死所歲時奉祀雍正二年

世宗御書成仁取義匾額恭懸祠中

遲變龍隸正白旗漢軍世居奉天授國史館副理事官再遷至山西糧道順治三年任江西布政使五年金聲桓王得仁據城叛將兵圍署使人勸降變龍抗節不屈賊率兵入署執全家強之變龍罵詈不絕口賊怒遂割舌抉目并碎其屍其祖孫父子兄弟妻妾閭門十八口俱繫石沉之江心江右

人莫不哀之康熙三十四年崇祀忠烈名宦

滕天成隸正白旗漢軍承襲佐領康熙十五年征
浙閩力戰海澄豬兜山死之

恩予卹廕入祀忠烈祠

正紅旗漢軍

孔有德遼東人隸正紅旗漢軍天聰六年來歸順
治六年以定南王率兵平粵西遂留鎮桂林九年
靖寶鎮將失守分遣赴援偽安西王李定國從間

道突犯桂林麾下李養性孫龍程希孔俱戰歿有
德知不守乃闔室舉火妃李氏以下並投繯拔劍
自刎死

賜諡武壯祭葬贈卹特加優厚祀昭忠祠

夏時芳隸正紅旗漢軍世居奉天累任陝西榆林
定邊道順治六年二月叛鎮姜瓖率賊兵困城十
九日城陷被執不屈罵賊遇害康熙元年八月追
贈太僕寺卿

恩賜全葬廕一子五品官

王國泰隸正紅旗漢軍世居開原初任三等護衛
康熙十三年八月隨經畧莫洛由陝西進征逆藩
吳三桂十二月至寧羌州提督王輔臣叛率兵來
攻我營國泰同經畧莫洛拒賊中鎗陣亡二十年
追贈副將廕其子同旗冠萬平康熙十四年以章
京隨征陝西遇王輔臣叛衆于娘娘廟力戰陣歿
贈雲騎尉世職

門可貴隸正紅旗漢軍世居錦州父世科崇德四年來歸授佐領後卒可貴襲職康熙十三年隨征逆藩耿精忠與賊戰於浙之花堡陣亡贈三等輕車都尉

王國柱隸正紅旗漢軍世居開原初任五品官康熙十四年六月進征江西至石匣擊賊陣亡贈雲騎尉世職

張廷輔隸正紅旗漢軍世居蓋平康熙十三年逆

藩耿精忠以福建叛勾連海寇命廷輔往勦十六
年三月抵福建聞海賊寇泉州廷輔往援擒賊帥
陳爵于西門追至海壩斬首數千級賊又攻同安
廷輔以百人敗其衆于三寶壩尋有賊衆萬餘圍
長泰陣於天津寨廷輔三戰三捷併降其衆賊攻
五都擒其驍將陳璽姚葵賊遂氣奪十七年六月
擊偽將軍劉國軒于海澄中礮歿二十一年贈雲
騎尉世職

阿爾泰隸正紅旗漢軍郎賽子也累官吏部郎中
康熙三年擢湖廣辰常總兵七年調鎮浙江黃巖
十三年逆藩耿精忠攻浙江阿爾泰擊敗之賊復
益兵攻城阿爾泰出城接戰我守城叅將武浩暗
降賊為內應遂被擒偽帥曾養性百計誘降不從
罵不絕口同總督范承謨俱死難

賜祭葬諡忠武雍正七年入祀昭忠祠子紹烈與耿精忠
賊衆戰于石塘嶺陣亡贈雲騎尉

王之鼎隸正紅旗漢軍世居奉天康熙十八年以定海將軍充四川提督恢復全蜀十九年九月孽逆吳世璠猶踞貴陽復犯永寧之鼎提兵進援賊黨尤廷玉胡國柱等九偽將軍之衆圍之數匝三閱月糧盡援絕猶間率兵挑戰士氣奮勇至九月九日賊以火藥轟城城陷被執拔刀自刎未絕昇至貴陽賊黨夏國相等百方勸脅大罵不屈遂與總兵何成德等十二人同時遇害

詔贈少保謚忠毅廕其子三等伯世襲立祠于貴陽南關之外

御書忠節垂芳匾額以旌之雍正七年入祀昭忠祠

陳先鳳隸正紅旗漢軍世居奉天任陝西遊擊康熙十八年從四川提督王之鼎征逆孽吳世璠十九年九月擊賊於貴陽陣亡二十年

賜祭葬銀兩廕其子四品官

鑲白旗漢軍

王興國隸鑲白旗漢軍世居奉天任四川永寧道
順治七年隨征流寇九年十月猝遇賊衆於華陽
陣亡贈世職三等輕車都尉

何世榮隸鑲白旗漢軍世居撫順任佐領康熙十
三年隨征逆藩耿精忠十七年擊海寇偽將軍劉
國軒於海澄世榮奮勇力戰歿於陣

恩賜祭葬立碑如典禮贈雲騎尉世職同旗鄭國明亦世
居奉天任驍騎校康熙十三年隨征湖廣十四年五月

與賊戰于永興陣亡贈雲騎尉世職

鑲紅旗漢軍

楊致祥奉天人隸鑲紅旗漢軍崇德時官啟心郎
順治五年知山西潞安府六年大同叛鎮姜瓖圍
潞安孤城援絕致祥奮身率家丁迎戰死城遂陷
賊圍府署搜親屬三十七人盡殺之郡人建祠以
祀康熙元年

聖祖追念死節之臣贈太僕寺卿同旗有孫定遼順治元

年從入關屢立戰功三年以征勦陽山寇戰歿贈三等輕車都尉

劉浩隸鑲紅旗漢軍世居錦州知廣西潯州府孫延齡反浩抗節不屈與子中樞中梁中柱中楫同日遇害

特賜祭一壇追贈太僕寺卿

吳萬福奉天人隸鑲紅旗漢軍崇德時授佐領康熙間任福寧總兵捍禦有方寇盜屏息十三年逆

藩耿精忠叛萬福發兵拒戰死之閩家見害贈太
子太保

予恩廕祀九忠祠

馬雄鎮隸鑲紅旗漢軍世居奉天由廕生任廣西
巡撫康熙十二年逆藩吳三桂反孫延齡叛應之
雄鎮密檄提督馬雄會勦雄遷延不至因蠟疏具
狀並遣子世濟世永間道入京乞師延齡訶知夜
發兵圍署百計擁之脅降罵賊不屈閩門死者百

餘人

詔贈太子太保兵部尚書諡文毅雍正三年入祀昭忠祠

乾隆十六年

特予恩騎尉世襲

陳啓泰蓋平人隸鑲紅旗漢軍任福建巡海道駐漳南時山寇徧授偽劄啓泰嚴保甲以靖反側康熙十三年逆藩耿精忠叛啓泰密與海澄公黃梧拒守會梧病事不可支語妻劉氏曰惟有一死以

報朝廷妻曰君為忠臣妾不能為烈婦乎遂及女
先自縊婢妾三十餘口相繼死啓泰從容引僚屬
入視皆相顧失色啓泰慷慨陳義無異平時具朝
服再拜乃自盡

詔贈工部侍郎諡忠毅雍正七年入祀忠烈祠乾隆十七
年

特予恩騎尉世襲

柯永昇隸鑲紅旗漢軍柯汝極從子初授知府康

熙十三年隨征逆藩吳三桂在湖廣辦理軍務有
方授湖南糧儲道歷任江西按察使安徽布政使
二十七年巡撫湖廣到任甫一月時湖廣各標因
裁汰兵額遂羣推夏逢龍為首鼓噪作亂殺司道
等官永昇亦被執罵賊不屈遇害

特加賜祭葬祀湖廣名宦祠

祝表正隸鑲紅旗漢軍巡撫祝世昌族子也累官
刑部郎中康熙十二年冬逆藩吳三桂反十三年

正月大軍由陝西湖廣兩路進勦以尚書莫洛經
畧陝西莫洛薦表正才遂隨行于二月抵寧羗叛
鎮王輔臣作亂莫洛遇害輔臣執表正回畧陽勸
令從逆不為屈遂加幽禁十四年

聖祖念輔臣曾呈首吳三桂逆書因遣伊子繼正往諭悔
罪來歸輔臣讀

勅留其子繼正即出表正於獄令賫疏自理委罪莫洛
聖祖復命表正賫諭往撫多方開諭輔臣遲疑不決復拘

繫之表正以理切責遂與家人劉福壽雙頂大桂
並為所害

李顯孝奉天人隸鑲紅旗漢軍父茂芳

國初以管壯丁著茂績崇德五年七年隨征明錦州
皆有功授佐領累加世職至一等輕車都尉顯孝
其次子也康熙十五年隨征逆藩耿精忠天寶寺
蜈蚣山之役皆在事有功十七年海賊劉國軒犯
海澄顯孝進戰陣亡贈加一雲騎尉

正藍旗漢軍

佟養甲撫順人隸正藍旗漢軍

太宗時直內院理事順治二年以總兵官銜從貝勒博洛
南征明年浙江福建平

命養甲與李成棟率兵定廣東是時明桂王由榔據肇慶
僭號永歷唐王聿鍵弟聿鏐據廣州僭號紹武養
甲偕成棟自漳州入惠潮平之亟趨廣州遂擒聿
鏐及周益遼諸王世子十三人又明年分兵取南

雄韶州檄成棟進兵肇慶由榔竄梧州走桂林我
兵乘勝下梧州追斬其大學士丁魁楚于岑溪遣
總兵徐國棟等畧定高雷連瓊等州兩粵將次平
而明主事陳邦彥覘大軍四出成棟方移師趨桂
林養甲駐廣州兵力稍單遂糾甘竹灘盜余龍突
犯廣州海盜馬元生等應之以數萬衆薄太平門
養甲督民兵扼門外陣斬數百級賊稍却尋成棟
自桂林還救賊皆遁去明尚書張家玉亦乘間陷

東莞養甲偕成棟攻復之並徇三水新寧諸邑悉就勦撫明總兵李承志等以平樂潯州兵來歸即令招諭左右江諸路降之未幾邦彥約其大學士陳子壯以蚤戶萬餘再犯廣州潛結指揮楊可觀為內應養甲伺其謀斬可觀擊敗子壯等于五羊驛又敗之禺珠洲順風縱火焚其舟數十斬馘無算子壯等皆就擒圍家玉于增城城破家玉赴水死粵東復平養甲力請進兵定粵西並請發禁旅

討偽秦王孫可望等于滇黔時恭順王孔有德已
奉

命軍湖南防勦可望等乃

詔滇黔大舉侯有德疏報再議而以兩粵專委養甲方養
甲之自閩而粵也以巡撫署兩廣總督成棟以總
兵署兩廣提督迨奏功兩人皆實授而成棟止轄
廣東不兼兩廣成棟自負功多疑養甲抑已奏不
以實又與養甲部將郝尚久爭功有隙遷怒養甲

會降將金聲桓王德仁叛于江西犯贛州養甲趨
成棟赴援成棟遂據南雄叛迎由榔至肇慶謀與
聲桓合兵圍贛州養甲知之間使移贛州守將書
俾嚴戒備為成棟所獲益恨之乃以兵四百人劫
養甲擁至肇慶養甲大罵不屈成棟密使其黨張
祥賊殺之時順治五年冬十一月也事

聞贈太子少保廕一子入監

予祭葬入祀昭忠祠又同旗有佟國仕任井坪路叅將佟

養昇奉

旨養馬大同俱于順治五年逆環之亂巷戰而死

詔贈國仕副總兵養昇入祀大同忠烈祠

佟恒年撫順人隸正藍旗漢軍以領催隨叔父佟
養正戍守鎮江天聰八年其屬下將弁謀叛執養
正父子併恒年獻于明島帥毛文龍恒年與養正
等並不屈死之贈佐領世職其族孫孫世功初任佐
領康熙十五年隨將軍圖海討叛鎮王輔臣於陝

西師次高長坡攻偽總兵李黃英營戰歿二十五
年追贈雲騎尉

佟圖占撫順人隸正藍旗漢軍父養澤以業商通
誠

本朝被繫自獄逃出遂來歸授三等叅領天聰八年
卒圖占授佐領崇德三年隨鄭親王濟爾哈朗等
攻明寧遠次中後所以巨礮攻附近諸臺礮轟裂
圖占歿於陣累贈至一等輕車都尉

馬如璧遼陽人隸正藍旗漢軍崇德五年以驍騎校從圍錦州明兵出城拒戰擊却之又擊敗松山杏山步騎兵進取松杏兩路臺堡六年再圍錦州攻克駱駝山寨明兵自十三站乘夜來襲如璧與叅政碩詹陷陣殺敵甚力及明總督洪承疇以兵十三萬赴援軍於松山聯絡塔山諸臺堡為聲勢如璧與石廷柱等徇塔山路以巨礮攻下之七年擢佐領隨鄭親王濟爾哈朗等取塔山松山八年

復從取中後所及前屯衛二城順治元年授騎都尉世職兼任佐領二年英親王阿濟格勦李自成于陝西如壁隸其軍躡賊至湖廣與叅領劉仲錦等擊走偽總兵馬進忠於武昌六年從鄭親王濟爾哈朗征湖南時明桂王朱由榔據武岡自成遺黨李錦劉體純王進才皆附之分踞寶慶衡州如壁自岳州趨長沙衡州屢戰皆捷復偕副都統金維城逐北靖州猝遇伏馬中流矢死以短兵步戰

力竭歿於陣追贈三等輕車都尉同旗有鍾尚勇
世居鐵嶺亦以四川馬湖之役陣亡贈雲騎尉
陳一德奉天人隸正藍旗漢軍初任佐領崇德八
年隨鄭親王濟爾哈朗等攻中後所及前屯衛皆
督放巨礮有功順治元年授加一雲騎尉是年五
月隨都統葉臣等往平山西圍太原以礮攻克其
城二年隨豫親王多鐸等平河南江南攻武岡山
寨中礮歿於陣贈騎都尉

王之儀廣寧人隸正藍旗漢軍康熙四年知福州府耿精忠叛變起倉卒人人震懼之儀獨奮呼曰賊敢反耶語未絕刀戟交下立斃子琅妻張氏亦皆自殺

詔贈太僕寺卿入祀忠烈祠

甘文焜奉天人隸正藍旗漢軍康熙八年任雲貴總督時吳三桂在滇歲糜軍餉數百萬役重民困文焜悉與蠲免奏增驛遞夫價以給歲運會內艱

請假葬親還京

召對面陳三桂不軌狀十二年五月回任十二月三桂反
提督李本深以安順應之文焜以省城不可守殺
其妾攜子國臣馳赴鎮遠思招集楚兵阨險隘使
賊不北出時副將姜義先已從賊各營響應文焜
知事不可為赴吉祥寺先縊其子北面再拜痛哭
自刎筆帖式武善雅度等皆死之

詔贈文焜兵部尚書諡忠果又按察使李興元貴陽府同

賜卹廕如例

知楊應鸚皆遼東人守節不屈先後被害並

鑲藍旗漢軍

朱珊奉天人隸鑲藍旗漢軍父繼文天命六年大
軍克遼陽即來歸以軍功官叅將及請老珊襲職天
聰五年隨征明大凌河戰歿

張瑞午奉天人隸鑲藍旗漢軍總督張存仁弟存
義之子也順治初歷任州牧擢知府康熙十三年

遷福建邵武守逆藩耿精忠反分遣逆檄下徇各
郡縣端午被執罵賊不屈死子六人同遇難

賜祭葬贈太僕寺卿

段應舉遼陽人隸鑲藍旗漢軍從征叛鎮姜瓖及
進勦孫可望等於湖南皆有戰功康熙十五年進
征逆藩耿精忠當克收福建全省時誓師戒殺秋
毫無犯會十七年海賊鄭錦等併力犯海澄食盡
援絕城陷自縊死

恩予輕車都尉世職雍正初入祀昭忠祠

王應魁隸鑲藍旗漢軍世居錦州康熙中知江西南豐縣時耿精忠叛所在山寇響應應魁率家人與鎮兵分城而守鎮將失守城陷應魁自刎

詔贈按察使僉事入祀忠烈祠

奉天籍屬

徐勇奉天人順治二年以總兵鎮黃州屢勦降九
江湖北流寇旋移鎮長沙五年流寇犯安仁勇一

鼓殲之是年冬賊黨一隻虎等率衆薄長沙勇勒兵與戰賊益衆乃嬰城堅守賊攻不下遁去尋調辰常總兵賊黨張光翠等犯辰州勇與叅將張鵬等力戰城陷死之妻曹氏子祚泰闔門三十九人皆遇害

詔加贈太子太傅

賜祭葬進一等男諡忠節建祠江夏乾隆三十二年

上念綠旗官弁致命疆場克昭義烈者於世職襲滿時

特予恩騎尉世襲罔替徐勇與馬

郭之秀瀋陽人順治三年任福安知縣時寇盜方熾之秀竭力禦撫會明末餘寇聚衆焚掠督兵與戰為流矢所中死

詔贈按察使僉事祀本縣忠義祠

林中瑜遼陽人順治三年以副將鎮太平奉檄勦撫麻姑港口兩見膚功郡東小醜竊發中瑜領兵搗賊馬陷深塹死之

詔贈副總兵祀忠烈祠

董璘廣寧人知福建沙縣時縣境初闢民多流亡璘悉心撫字始有更生之樂順治四年土寇攻城糧乏待救不至死之

詔贈按察使僉事祀本縣忠義祠

甘體垣奉天人順治初知閩之海澄四年土賊攻城城破欲污以偽命不受沉之水邑人建祠祀之

詔贈按察使僉事祀本縣忠義祠

李懋祖奉天人官湖廣郴桂兵備道僉事順治五年留署廣西巡撫駐永州明巡撫何騰蛟自全州引衆逼永州十一月城破懋祖及其子廷賡俱殉難

詔贈光祿寺卿入祀忠烈祠

王昌齡遼陽人官冀寧道順治五年大同總兵姜瓖叛昌齡轉餉軍中遇賊被害

詔贈光祿寺卿又定襄令祝文光垣曲令李榮宗繁峙令

崔尚質襄垣令終學詩屯留令陳思忠以循良廉
能著績皆遼東人俱于姜瓖之亂殉節而崔尚質
闔門自焚死尤烈

詔贈崔尚質光祿寺少卿祝文光等俱贈按察使僉事並
賜入祠春秋致祭

王來觀奉天人任河東分守道降霍州知州順治
五年姜瓖叛以霍為南北孔道攻益力來觀督兵
以守城陷血戰死祀忠烈祠贈太僕寺卿又長子

令李允升賦黨夜冒官軍入城允升不屈被殺文
水令曹之賢年少精敏長于斷獄悉力捍城城陷
被害

詔贈李允升曹之賢按察使僉事

鄭鴻圖遼陽人任河東鹽運使同知甫莅任值姜
瓖叛登陴守禦力盡城陷死之

詔贈河東鹽運使祀忠烈祠

宋之玉奉天人順治初任大同兵備道駐朔州五

年姜瓖叛密與通判楊達知州王家珍謀靖內患
既而變猝起謀不克遂手刃愛子以死家珍亦奉
天人亦不屈死

詔並賜祀忠烈祠卹廕如例

金光祥奉天人順治五年任寧武兵備道僉事姜
瓖之叛寧武兵應之光祥自縊死

詔贈光祿寺卿祀忠烈祠

錢法裕本浙人占籍遼東順治初知蒲州府姜瓖

叛城陷被執不屈死

詔贈布政使叅議祀忠烈祠

夏廷印廣寧人官神木觀察副使以清恪聞順治五年高有才之變慷慨赴難死於府谷時延綏總兵沈文華義州人亦為高有才所害

詔贈沈文華提督夏廷印按察使並祀忠烈祠

夏一統志作徐

宋賢都奉天人順治五年知城武縣時逆寇李化鯨作亂賢都猝不及備先以甘言怠其謀化鯨遂

攻曹縣賢都募死士夜薄其營化鯨覺還攻城武
賢都力戰闔門二十八人皆被屠戮

詔贈光祿寺少卿祀本縣忠義祠

蔡廷棟廣寧人以拔貢任兗州府學訓導署張秋
捕河通判以擒土寇丁惟獄功陞曹縣教諭李化
鯨陷城棟力戰死之

賜祀忠烈祠廕卹如例

李絮飛奉天人順治五年為甘肅臨鞏道甫至任

會回人米刺印叛殉節死蘭州同知趙翀學隸正
白旗漢軍同時死難

詔贈太僕寺卿祀忠烈祠

朱衣助奉天人順治五年知深州時土寇未盡披
堅執銳為士卒先捍衛撫循士民德之歷任操江
為海賊鄭成功兵所獲不屈而死

詔贈太僕寺卿祀忠烈祠

李文學奉天人順治六年知定陶縣時李化鯨餘

黨邢可觀猶負固榆園文學莅任三月遇賊於白
塔坡挺身與戰身被數創而死

詔贈光祿寺少卿祀本縣忠義祠

文運亨奉天人順治初任永昌之新田令值猖賊
犯城運亨率兵拒守賊衆大至城陷遂遇害

詔予祭葬祀忠烈祠吏民德之並祀本縣名宦祠

吳國用奉天人順治六年知霍邱縣興革協宜山
賊陳伯紹倡亂擁衆攻城會久雨城圯國用率兵

巷戰揮刀躍馬殺賊七人力盡自刎

詔贈按察使僉事祀本縣忠義祠

塗郭奉天人任河南河北兵巡道順治六年寇陷
隆平延及武安廓親率兵勦捕馬蹶陣亡

詔贈光祿寺卿建祠以祀

唐士傑奉天人順治中除南漳縣時土賊盤踞西
山出沒無常士傑每挺身勦賊賊勢蜂擁力不能
支遂自焚死祀本縣忠義祠贈廕如例

王希舜遼陽人歷任分巡河西道寬簡愛民順治六年王永疆作亂攻陷延安榆林等十九州縣希舜不屈死之

詔贈光祿寺卿祀忠烈祠

徐大用奉天人歷任叅議道分守萊州順治十年膠州總兵官海時行素驕蹇因調南征遂募兵為逆逼勒大用同入海不從遂被害祀忠烈祠廕卹如例

劉登科奉天人知浙之黃巖縣順治十四年海寇陷城脅降不從遂縛投三江水中死士民哀之祀本縣忠義祠贈如例

魏萬侯奉天人武進士任浙江溫州鎮左營遊擊康熙甲寅夏閩寇圍瑞安縣萬侯率師援擊至北湖嶺斬馘甚衆以後軍不至還保慈湖既而羣賊蜂集勢不能支力戰死之長子棟亦歿于軍

詔贈副將入祀忠烈祠

廖有功瀋陽人官福州千總康熙甲寅三月耿精忠會文武諸僚脅制府范永謨為亂有功不從大呼奮擊手及十數賊躍馬至通衢逆兵追擊遂遇害祀忠烈祠廕卹如例

范文英奉天人官江西饒州府同知時耿精忠叛以兵犯城文英與知府郭萬國同死於難祀忠烈祠廕卹如例

李成功奉天人任潮州叅將隸湖鎮劉進忠麾下

康熙十三年耿精忠叛進忠密授偽職成功謀於
于國璉共誅之機泄被執不屈死

詔贈驃騎將軍祀忠烈祠

于國璉奉天人授防禦職性忠勇與叅將李成功
謀誅叛鎮劉進忠事泄進忠擊璉璉射進忠中臂
力戰三晝夜乃死祀忠烈祠廕卹如例

王忠孝奉天人康熙十五年署廣東左翼鎮總兵
進勦吳三桂于滇南衝鋒破敵身先士卒引兵深

入陷陣死

詔贈都督同知祀忠烈祠

徐盛奉天人康熙十五年知廣安州譚宏之亂為

賊所縛不屈死

詔贈四川布政使叅議祀忠烈祠

欽定盛京通志卷八十六

欽定四庫全書

欽定盛京通志卷八十七

孝義

三國魏

晉

遼

金

元

明

國朝

欽定四庫全書

欽定盛京通志卷八十七

孝義

臣等謹案聖王教孝以重倫明義以訓俗是以
表厥宅里樹之風聲

盛京風俗醇厚

聲教所先前史孝義著聞若魏之王簡遼之耶律安
圖其可謂敦行不怠慕義無窮者歟金元迄明

代有可稱我

朝崇起教化扶植綱常其孝義著稱者可以光前可
以勸後謹志孝義第二十六

欽定四庫全書

欽定盛京通志卷八十七

孝義

三國魏

王簡元菟郡高顯縣民也吏民叛令長熙為賊所
殺簡負熙喪星夜行致本州魏正元二年詔以簡
忠節可嘉特拜為忠節都尉以旌殊行

晉

李信襄平人父敏避公孫度將家屬浮於海不知所終信出塞徧求不得越二十年不娶欲行喪制服則疑父尚存遂欲終不聘娶燕國徐邈責之曰不孝莫大於無後可終身不娶乎乃娶妻生子屏遠房帷常如居喪之禮悲鬱數年而卒子宣伯生不識父母及長蔬食哀戚恒如居三年之喪以父祖皆不知存歿設木主事之詳見本志人物卷按

三國志公孫度傳裴松之註云敏將家屬入海而復與子相失未詳其故或舊史有誤姑存之

以志
闕疑

遼

耶律安圖父迪里因建言立東丹王被誅安圖自
幼若成人居父喪哀毀過禮見者傷之太宗屢加
慰諭嘗曰此兒必為令器既長寡言笑重然諾動
遵繩矩事母至孝以父死非罪未葬不預宴樂世
宗在藩邸尤加憐恤太宗崩諸將欲立世宗以魯
呼及壽安在朝猶豫未決時安圖直宿衛世宗密

召問計安圖曰大王聰安寬恕人皇王之嫡長先
帝雖有壽安天下屬意多在大王今若不斷後悔
無及安圖乃與北院大王幹南院大王吼等定計
整軍召諸將奉世宗即位以安圖為腹心總知宿
衛是歲和于潢河橫渡太后問安圖曰吾與汝有

何隙安圖以父死為對太后默然

安圖國語解見吉林城池卷原

作安搏魯呼解見人物卷原作李胡迪里解見
名宦卷原作迭里今俱譯改又按耶律幹耶

律吼俱詳本
志人物卷

耶律淵臨潢長壽人任奉聖州砮山監淵課耕稼
勞來有方在軍十有五年與士卒同甘苦未嘗妄
笞一人比休致親已歿即于縣西卜地以葬因家
砮山哭必盡哀祭必盡敬一時士民皆化之

張寶錦州人四世同居道宗嘉之令其子為三班
祇候

金

耶律安禮系出約尼氏幼孤事母以孝聞天眷初

從元帥于山西遭母喪冒大暑挽柩行千里餘哀
毀骨立天德間歷工部尚書被詔鞠韓王亨獄白
無反狀海陵怒再遣李老僧殺亨於獄海陵將伐
宋安禮密諫忤海陵意罷為南京留守安禮嘗從
帥府再伐宋寶貨人口一無所取時議賢之

約尼
解見

人物卷原作
違輦今譯改

盧亨嗣字繼祖臨潢人彥倫之孫也初由祖廕得
官以課最遷至定遠大將軍莒州刺史與弟亨益

盡友愛之道大定十六年父璣為同知宣徽院當
廕子亨嗣以讓弟弟早卒子𦉰𦉰幼稚乃悉以舊
業田宅奴畜與之

翟巽貴德州人章宗明昌元年詔賜絹十匹以旌
其孝行

舒穆魯元字希明懿州路人七歲喪父號泣不食
者數日年十三居母喪如成人嘗為擊鞠戲馬踏
歎曰生無兄弟而數乘此險適有不測奈何由是

終身不復為之補樞密院尚書省譯史遷監察御

史同知淄川軍州事歷知濟南府卒生平寡言笑

尚節儉居官自守不交權要人以是稱之

舒穆魯八旗姓

原作石抹

今譯改

趙仁榮忠愍公炳之子炳為郭琮郭叔雲所害

詳見

人物卷
趙炳傳

事發琮叔雲皆伏誅命籍其家以付仁榮

仁榮曰父為所害不共戴天之讐且所蓄之物皆

取于民何忍受之帝乃別賜鈔二萬二千五百緡

使治喪具仁榮後仕至中書平章政事

完顏鼎一名色埒默字國器完顏藝之從兄也年
二十以善戰知名貞祐中藝為元兵所虜母留豐
州鼎事之甚謹藝在北大帥甚愛之歲餘托以省
母乞還大帥以卒監之至豐鼎乃與藝刼殺監卒
奉藝母南奔既而失馬載以鹿車兄弟共挽南渡
河宣宗奇之鼎以世官授都統未幾行壽泗元帥
府事以藝自隨軍中事藝皆得預鼎病軍中李大

和與方城鎮防軍葛宜翁相毆訴於縣縣知宜翁
事不直量筭之宜翁死其妻訟之官縣久繫獄鼎
入朝哀宗怪其瘦問卿寧以方城獄未決故耶吾
今赦之矣未幾鼎卒上聞使馳赦縣曰有司奏汝
以私忿殺人汝兄死失吾一名將今以汝兄故曲
法赦汝他日汝奮發立功名始知我不妄赦矣縣
後卒為良將死于難

色埒默國語解見忠節
卷原作斜烈今譯改

劉慶祐錦州人有孝行明昌三年詔賜慶祐絹粟

旌門閭復其身

謹按金史如完顏蘇埒史稱其居喪廬墓至孝
昭然因其死節已載入忠節門是卷不更臚載
謹附識其孝行于卷

元

舒穆魯昌齡興中人性至孝以廬墓特旌

舒穆魯
八旗姓

原作石抹
今譯改

張洪範北京人親喪廬墓三年詔旌之

郭全遼陽人幼喪母哀戚如成人及壯父廷玉又卒倚廬三載啜粥面墨事繼母唐古氏孝繼母生四子皆幼全躬耕奉養四子既長娶婦各求分析全不能止凡田廬器物皆取朽敝者奉繼母甘旨無乏唐古氏卒全年六十餘哀毀廬墓詔旌其門孫秀實大寧人性剛毅喜周人急里中王仲和常託秀實貸富人鈔二千貧不能償逃去數年其親思之成疾秀實日饋米薪存問又為代償取券還

其親後命奴訪仲和使歸父子歡聚聞者莫不嗟
嘆又有貸秀實鈔多至數千不能償者盡以券還
之事聞詔旌焉

劉廷讓大寧人至順初北方兵起遇亂挈家走避
山中有幼弟方乳母王氏置于懷賊追急廷讓棄
其子一手抱幼弟一手扶母疾驅得免事聞旌之
高守質瀋陽人事親篤孝詔旌其門

明

尚忠義州人百戶劉雄部軍景泰中敵入犯邊雄率忠力戰雄馬中箭死忠以已馬授之雄潰圍出忠亦幸得免人稱其義烈為難

蘭英蓋州軍人也成化九年隨總兵歐信出塞追敵敵因風縱火軍潰信馬中箭死英以馬授信信乃得出而英遂遇害巡撫李貢作碑表其義

劉鼎遼陽人初喪生母嫡母姚氏撫之成化中任鴻臚序班姚氏歿鼎在京師聞訃奔至葬所悲哀

廬墓負土築墳事聞旌表

李用廣寧人生員弘治間母張氏卒既葬廬於墓側晨昏哭奠事聞旌之

邵義鐵嶺人未婚父母皆亡義廬墓三年鄉人憫其孝勸之娶妻親迎畢不入房室復廬墓三年

劉定遼陽人父王任正千戶以疾卒定悲哀廬墓事聞旌表

吳裕廣寧衛人少孤母王氏教育之比長遊庠貢

於禮部會母疾衣不解帶藥必先嘗母卒裕哀毀
慘悴既殯廬於墓朝夕哭泣三年如一日後裕仕
至和州判官年八十餘卒於家

紀刺漢廣寧衛人五歲喪母及長父聰病篤思肉
乃割股煎湯以進父遂愈六載乃故廬墓三年撫
臣書孝行扁以旌其門

史璠廣寧衛人天性和平樂聽善言母病朝夕侍
立病篤益勤苦夜不就枕及母卒行古喪禮倚廬

中門絕酒肉遠帷薄三年不出給事中賀欽作倚
廬記表之

文淵益州衛人居父母喪哀毀盡禮先後廬墓六
年仕至陳州知州高陵呂柟銘其墓

李光祖遼陽人父敏以學行稱正德間敏以疾卒
光祖三日不食哀毀踰節比葬廬墓三年

程鉉廣寧衛人太學生母病日侍湯藥夜不解衣
母轉病痢鉉間醫者言糞甘滑者不治鉉嘗之果

甘悲號幾死母旋卒值鄰家失火風急勢迫鎡撫棺號曰萬一不虞與母俱焚耳忽焉風反火滅人以為孝感所致

姜節金州衛人父早亡正德間母周氏病節日夕拜禱因獨宿戒酒肉密剖股和羹奉母食之遂愈至九十餘無恙

宮守禮寧遠衛人生員性端謹好古守禮父思問病衣不解帶藥必親嘗及卒廬墓三年有白雀來

巢於墓上事繼母尤謹朝夕率妻拜問繼母初欲改適感其孝遂止與鄉人飲守禮在坐少長莫敢誼譁其風動流俗如此嘉靖間守臣上其事詔旌其門

朱國禎廣寧衛人父歿居喪盡禮力營葬事治墳塋松楸鬱然皆手植也結廬墓側朝夕哭奠如初比終制羸瘠而死妻劉氏艾年守志撫孤成立同時節孝並稱

葉洪廣寧衛人幼孤依母度日嘉靖間母病思食肉麪餅不能辦乃傭于人得麪一升又苦無肉遂割股肉以進母病即愈

趙堂廣寧人父母先後俱病甚堂割股進食病咸愈

王斌開原衛人母聞氏久病無方可療斌向土神廟祈祝乃割肋取肝一片煎湯以進母食之病即愈斌亦無恙

周顯時益州衛人父愛幼子臨終以三千金私與之及卒顯時廬墓三年終身篤友于之誼若勿知予金事者後官至總兵

李慶錦州人官百戶四世百口同居慶年百餘歲人咸重其齒德同郡張寶亦四世同居一時義之國朝

繆鴻業海城人親歿廬墓知縣王沛恂嘉其孝書忠孝節義四大字於學宮之壁而以鴻業廬墓事

註孝字下以獎之

鐵範金字式之承德縣人性至孝母疾篤範金親侍湯藥衣不解帶一夕母忽昏絕範金以暮夜難于延醫遂割腕肉以進母立甦丁丑範金成進士選庶常授翰林院檢討尋擢江南學政未至卒

祁祖西正白旗人素有孝行母歿廬墓三年康熙五十二年

旌表

王瓚奉天人事親孝乾隆六年

旌表

欽定盛京通志卷八十七

欽定四庫全書

欽定盛京通志卷八十八

文學

北魏

遼

金

元

明

國朝

欽定四庫全書

欽定盛京通志卷八十八

文學

臣

等謹案遼瀋山川雄秀文學始於漢王景班
史稱之而其書不傳北魏時屈遵最著自遼祖
起松漠輦致晉圖書景聖之間文風蔚起逮乎
金源人材輩出文物聲名彬彬盛矣我

國家發祥肇迹覃敷文教

留都近地漸被尤先我

皇上翠罕頻臨

詔廣學額士之鍾靈毓秀以漸被

壽考作人之化其必有日新月盛濟濟維楨者矣謹志

文學第二十七

欽定四庫全書

欽定盛京通志卷八十八

文學

北魏

屈遵字子皮徒河人博學多才藝名著當時歸魏
太武拜中書令出納王言兼總文誥賜爵下蔡子

按徒河北
史作徒何

遼

耶律古裕字休堅六院部人古裕冲澹有禮法工文章統和中為本部太保開泰中鞫霸州疑獄稱旨授啓聖軍節度使太平中復為本部太保謝病歸俄擢南院大王歎風俗日頽請老不許興宗命為詩友數問治要多所匡建奉詔與林牙耶律庶成蕭韓嘉努編遼國上世事迹及諸帝實錄未成而卒年九十

唐古特語古裕栢柳也原作谷欲韓嘉努原作韓家奴今俱譚改

蕭韓嘉努字休堅納喇部人少好學弱冠入南山

讀書博覽經史通遼漢文字重熙四年官天成軍
節度使徙彰愍宮使帝與語才之命為詩友屢有
獻納詔作四時逸樂賦稱善詔與耶律庶成錄約
尼可汗至重熙以來事迹集為二十卷又詔博考
經籍情文制度可行于世不繆于古者撰成三卷

又詔譯諸書有六義集十二卷行世

納喇八旗姓
原作湮刺約

尼解見孝義卷原
作逸輦今俱譯改

耶律庶成字喜隱幼好學讀書過目不忘善遼漢

文字尤工於詩官樞密直學士與蕭韓嘉努各進
四時逸樂賦與撰實錄禮書修定法令有詩文及
譯方脈書行於世

耶律良字實訥生於乾州讀書醫巫間山重熙中
補起居注清寧中上幸鴨子河作捕魚賦遷知制
誥請編御製詩文目曰清寧集上亦命良詩為慶
會集親為之序後以功累官同知南院樞密使出

知中京留守追封遼西郡王謚忠成

實訥蒙古語
解見名宦卷

原作習然
今譯改

耶律富魯字諾延庶箴子重熙中舉進士聰悟好
學博通經籍契丹人舉進士自富魯始除牌印郎
君應詔賦詩立成興宗嘉賞顧左右曰文才如此
必不能武事會從獵富魯矢中三兔興宗奇之轉

通進父庶箴寄戒諭詩富魯答以賦世稱典雅

富魯解見

黑龍江城池卷原作蒲魯諾延解
見名宦卷原作乃展今俱譯改

耶律孟簡字復易性穎悟六歲時父劉家努晨出

獵令賦曉天星月詩孟簡應聲而成父大奇之既
長善屬文太康初以得罪奸臣伊邈流保州及聞
皇太子被害不勝哀痛以詩傷之孟簡義命自安
及釋歸詣闕上表請修國史曰本朝之興幾二百
年宜有國史以垂後世上命置局編修孟簡謂餘
官曰史筆天下之大信一言當否百世從之苟無
明識好惡徇情則禍不測可不慎歟乾統中為六
部院太保處事不拘文法時笑其迂孟簡聞之曰

上古無簿書法令而天下治簿書法令豈聖人致

治之本乎

伊遜解見人物卷
原作乙辛今譯改

謹按舊志以耶律學古耶律資忠耶律哈瑠列

入遼文學今考遼史三人本傳學古保障南京

功業昭著資忠哈瑠則守正不阿品誼端正俱

未可僅以文學賅之是以移載入本志人物門

是卷所載則悉係以文學知名者謹附識其體

例子篇

金

完顏朮字勉道穆宗第五子好學問國人稱為秀才宗翰宗望定汴太宗使朮勞軍贈賄皆不受惟載書數車而還朮好學能文所撰本國郡望姓氏譜及他文甚衆累功封金源郡王

邢具瞻字崑夫遼西人天會二年進士與吳激蔡珪為文章友工于詩詞仕至翰林待制

楊伯仁字安道伯雄之弟也天性孝友讀書一過

不忘文詞典麗時輩莫及登進士第養親不求調
天德二年除應奉翰林文字轉修撰世宗時孟宗
獻發解第一伯仁讀其程文稱之曰此人當成大
名是年宗獻府試省試廷試果皆第一號孟四元
時論以為知文尋授伯仁左拾遺上書論事改大
名少尹郡中豪民恣橫伯仁窮竟渠黨四境帖然
獻館陶大辟得其寃狀縣人為之立祠

鄭子聃字景純大定府人幼與兄子京時稱為鳳

毛及冠有能賦聲天德三年廷試一甲三名子聃
自負常恨不得居第一人正隆二年海陵以進士
第一程文問子聃子聃少之海陵不悅乃使子聃
與翰林修撰楊伯仁宣徽判官張汝霖等同進士
雜試子聃文果第一海陵竒之擢修撰改侍御史
京畿早詔子聃決囚遂澍雨人以此顏真卿累遷
侍講兼修國史以海陵實錄專任之子聃英俊有
真氣為文亦然平生所著詩文至二千餘篇

馮子翼字士美大定府人正隆二年進士性剛果
與物多忤用是仕宦不進以同知臨海軍節度使
事致仕工詩樂府

劉仲尹蓋州人正隆二年登第後以潞州節度副
使召為都水監丞能折節讀書諸詞樂府俱極蘊
藉墨梅詩尤為人傳誦有龍山集傳世

按仲尹劉
祁歸潛志

又作遼
陽人

張景仁字壽甫遼西人累官翰林學士承旨大定

初與宋議和國書往復多出其手世宗常稱之曰
今之文章如張景仁與宋人往復凡七書指事達
意辯而能裁真能文之士也遷學士兼御史大夫
時堊元妃李氏平章政事烏庫哩元忠以都水丞
治道不如式決之四十景仁劾元忠擅斷六品官
無人臣禮朝廷肅然史臣以儒者之勇許之

耶律履遼東丹王七世孫家廣寧方五歲時卧廡
下見微雲往來天際忽謂乳母曰此所謂卧看青

天行白雲者耶及長秀峙通悟博學多藝善屬文
精厯算書繪事初舉進士惡搜檢煩瑣去之廕補
承奉祇候國史院書寫擢經史院編修世宗問朕
讀貞觀政要見魏徵嘉謀忠節近世何故無如徵
者對曰忠嘉之士何代無之在用不用耳世宗曰
朕起用劉仲晦張汝震以其居諫職屢有忠言也
安得謂之不用履曰海陵杜塞言路天下緘默成
風願陛下懲艾前事開諫諍之門天下幸甚章宗

好讀左傳召質所疑履曰左傳駁而不純尚書孟子聖賢純全之道願留意焉帝嘉納之後拜參知

政事特賜大定三年孟崇榜下進士及第累官禮

部尚書兼翰林院直學士明昌三年進尚書右丞

卒謚文獻初族父德元未有子以履為後既而生

子震德元歿盡推家資與之子辨材善材楚材皆

有名

耶律履金史作移刺履
今從耶律楚材傳改正

李獻可字仲和遼東人太師金源郡王石之子世

宗元妃之弟大定十年累官大興少尹遷戶部侍郎終山東東西路提刑按察使長于詩絕句尤佳王庭筠字子端蓋州熊岳人後家河東父遵古官至翰林直學士庭筠生未期視書識十七字七歲學詩涿郡王修一見期為國士登大定十六年進士調恩州軍事判官臨政有治績明昌元年詔試館職中選坐論事罷卜居彰德讀書黃華山寺因以自號三年召為應奉翰林文字命與秘書郎張

汝方品第書法名畫嗣遷修撰泰和元年扈從秋
山應制賦詩三十餘首上甚嘉之明年卒詔有司
賻喪事求其平生詩文藏之秘閣庭筠儀觀秀偉
外若簡貴人初不敢與接既見和氣溢于顏面少
有可取極口稱道從遊及所薦引者皆一時名士
世以知人許之為文能道所欲言暮年詩律深嚴
七言長篇工險韻善書法學米芾尤精山水墨竹
著有叢辨十卷文集四十卷子曼慶亦能詩并書

仕至行省右司郎中自號澹游云

按王庭筠金史作河東人元好

問中州集
作熊岳人

高衍字穆仲遼陽渤海人自少有能賦聲同舍生
欲試其才使一日賦十題未暮皆就彬然可觀登
進士第乞歸養逾二年方調補鄆陰丞世宗時累
擢至吏部尚書向每季選人至吏部託以檢閱舊
籍謂之檢卷有滯留至後季猶不得去者衍三為
吏部知其弊悉除之歲餘銓事修理選人便焉

完顏永成本名鶴野世宗子風姿奇偉博學善屬
文世宗尤愛重之大定七年始封瀋王章宗即位
進封吳尋進封充判太原府事永成自幼喜讀書
晚年所進益醇暇日與文士相切磋接之以禮未
嘗見驕色自號樂善居士明昌三年永成誕日上
賜以詩有美譽自應輝玉牒忠誠不待起金滕之
句當世榮之承安改元封豫王再判平陽府事以
疾召還尋薨謚忠獻有文集行於世

完顏璫世宗孫亦名壽孫字子瑜資質簡重博學
有雋才喜為詩工真草書正大初進封密國公璫
奉朝請四十年日以講誦吟咏為事與文士楊雲
翼趙秉文雷淵元好問李汾王飛伯等交善初宣
宗南遷璫載其家法書名畫一帙不遺居汴中口
多俸少客至不能具酒肴蔬飯共食焚香煮茗盡
出藏書相賞樂談大定以來故事終日而不厭也
至曹王出質璫見哀宗於隆德殿請代其行哀宗

慰止之未幾以疾卒平生所著詩文甚多自刪其
詩存三百首樂府一百首號如菴小稿元好問中
州集云百年以來宗室中第一人也

完顏守禧字慶之璫第五子也年少有俊才丰神
秀徹作詩多雋語璫特愛之

龐鑄字才卿蓋州人少擢第仕有聲南渡後為翰
林待制遷戶部侍郎尋緣事倖東平改京兆路轉
運使卒鑄博學能文藹然為一時名士工詩造語

奇健不凡世多傳之畫史云鑄善山水禽鳥

田永錫義州人少有詩聲其過東坡墳詩云富貴
一場春夜夢文章萬斛冷雲泉英魂返卻眉山秀
依舊春風草木天為人傳誦興定末試南京擢第
遭亂南遊江淮間卒

劉光謙字達卿瀋州人父澤為部掾劉之昂與之
酬倡有侯門舊說炎如火陋巷今猶冷似冰半夜
杯盤長袖舞白頭書冊短檠燈句用是人不敢以

府史侍之達卿資幹局處事詳泰和三年進士累
官司農少卿工詩

馮文叔遼東人工詩其客舍詩有句云生事甯中
搖虎尾窮途天下轉羊腸三朝不遇馮唐老半夜
悲歌寧戚狂為世所稱

王革字德新一名著臨潢人以蔭補官正大中六
赴廷試賜出身調宜君簿為人蘊藉少有才思詩
筆尖新

高憲字仲常遼東人衍之孫王庭筠之甥幼學於
外家故詩筆字畫有舅氏之風天資穎悟博學強
記年未三十作詩已數千首自言于世味一無所
好惟生死文字間而已官博州防禦判官遼陽破
歿於兵

元

耶律鑄字成仲楚材子幼聰敏善屬文領中書省
事採歷代德政合於時宜者八十一章以進從憲

宗征蜀屢出奇計世祖中統二年拜中書左丞相
至元初加光祿大夫奏定法令三十七章吏民便
之初清廟雅樂止有登歌詔鑄制宮懸八佾之舞
樂成賜名大成十年遷平章軍國重事監修國史
朝廷有大事必諮訪焉卒贈太師懿寧王謚文忠
耶律希亮字明甫楚材之孫鑄子也九歲師北平
趙衍未浹旬已能賦詩至元八年授符寶郎十一
年既平宋世祖問宋諸降將曰日本可伐否皆白

可希亮曰干戈甫定人得息肩俟數年後興師未
晚世祖然之累遷吏部尚書至大中武宗訪求先
朝舊臣特授翰林學士承旨知制誥兼修國史乃
類次世祖嘉言懿行以進希亮性至孝額呼布格
反時脅之西行困厄避方家貲蕩盡僅藏祖考畫
像四時陳列致奠朔漠之人咸共嘉嘆雖疾不廢
書史或中夜起坐取燭以書所著詩文及從軍紀
行錄三十卷目曰懷軒集卒封漆水郡公謚忠嘉

額時蒙古語解見吉林山川卷布格
解見人物卷原作阿里不哥今譯改

明

陳鑑蓋州人正統戊辰進士賜及第官翰林學士
使朝鮮有皇華集行世後官國子監祭酒陞禮部
侍郎

張鉞義州人弱冠即以詩名景泰間領山東鄉薦
累官解州知州篤行古道表率鄉閭出其門者多
致通顯

陳宗遼海人初城南池中多蓮忽生黃花一莖其
大如盤色甚鮮麗術者異之曰城中當出奇士已
而宗生四歲能書五歲屬文號神童十八登進士
官刑部主事陞尚寶寺卿卒

張升定遼中衛人聰明有雋才善屬文嘗謁巡撫
王翱試諭寇檄援筆力就辭氣沛然翱大驚異舉
正統丁卯鄉薦任本學訓導後改萬全都司儒學
訓導學宮舊有井向苦鹹升浚之遂甘冽土人呼


曰張先生井所著有齋菴稿行于世崇祀鄉賢

國朝

金世德鐵嶺人隸正黃旗漢軍淹貫經史兼習

國書順治初以廕補內院編修凡有大著作恒午夜
馳召之康熙丙午因招撫閩海功累遷副都御史
巡撫順天濬水利勤賑卹多惠政見屬吏必令盡
所欲言喜讀循吏傳清白自矢人莫敢干以私卒
謚清惠

高璜奉天人隸鑲黃旗漢軍幼沉毅讀書工文第
進士康熙二十一年任江西提學道時文風卑靡
璜力振起之以江西先正之文砥礪諸生風氣為
之丕變捐俸修南昌府學及郡邑學之廢壞者善
政甚多士民立碑祀之



欽定盛京通志卷八十八